

est Sive, à perpetuis nivibus dictus : ad Fokiang mons est Xecu, sic dictus à tympano lapideo : de quo observasse se scribunt Sinæ, quod, quoties sonum edit, toties futuri belli sit signum. Ad Ching civitatem Loyo mons est, in quo ingens Leonis statua, ex cuius ore fons effluit. ibidem est Cheuchi mons ad usque Siho civitatis finitima pertingens, in altissimo vertice magnam habet planiciem viginti plus minus stadiorum.

Ad Cin civitatem in Pochung monte herbam nasci scribunt Hoaco, quæ comesta steriles reddit, sunt & alii plures, in quibus nihil admodum memoratu dignum.

Flumina. Prope Ching civitatem lacus est parvus arboribus ac floribus in circuitu confitus, cives suas delicias vocant, ac ad convivia inibi celebranda sæpe concurrunt.

Ad Cin civitatem lacus est Tienxui, sive cælestis aquæ, quia ejus aqua multis medetur morbis.

Haud procul inde ingens lacus Tien centum viginti stadiorum ad Ven civitatem.

Ad Leangtang insula est parva nomine Pipa, & ad Siho fons amœnissimus.

Sexta Urbs

L I N Y A O.

SI paululum occasum versus procedamus Linyao urbs occurret vel ex eo nobilis, quod murus ille magnus hic finem capiat, cuius terminos statuunt montes, qui ad ripas Crocei fluvii sunt, eandem ornat rex è Taiminga familia, qui ibi sedem fixit suam; commendatur & ab auri copia, quod ex arenis colligitur in vicinis montibus & torrentibus. Uros seu boves sylvestres montosus urbis tractus habet, & animalia tigribus simillima, vulgo Pau vocant, quorum pelles pro vestibus expetuntur à Sinis: oves hic multæ quales in Perside ac Tartaria, oblonga ac crassa cauda, cuius caro præ reliqua suavissima; nec desunt pyra varia, pomaque: fana nobiliora tria. In Yvi divisione superioris tractus locum etiam sortita est hæc regio, ibique Sikiang dynastia fuit, Cina familia his terris occupatis Lungsi nomen dedit. Sunga familia Yencheu, Sui vero Rex ab auri copia Kinti dixit, hoc est auream terram, hodiernum nomen Tanga dedit familia: jacet urbs in monte, cuius partem ipsis moenibus includit, quæ Pao-ting dicitur, & quinque regit civitates, quarum 1 Linyao, 2 Gueiyven, 3 Lan, 4 Kin, 5 Ho.

*Aurum
& varia
que pro-
fert.*

Mons Cäolan ad modum theatri civitatem Lan amplectitur, pulcherrimo undique patente prospectu: ibidem ingens mons Pexe est, in quo nobilissimus dux Leanghoejus à Tartaris obsessus, cum aquam ad reficiendum exercitum consequi non posset, sacra monti fecisse dicitur ad impetrandum potum exercitui, & quam mox ibi fontem emicuisse. Ad civitatem Ho mons est Cixe, qui duos altissimos erigit vertices, quos inter quasi per portam intromissus Croceus fluvius volvitur. Supra Lan civitatem vallis est amœnissima, quam fluvius irrigans foecundat, unde armentis frugibusque lætissima est, Yu vallis dicitur, quæ meam Athesinam haud male refert.

Flumina. Croceus fluvius est ad occasum civitatis Lan: Yäo fluvius prope ipsa urbis moenia ingenti aquarum strepitu, tonitruque imitante boatu volvitur, scaturigo in Sifan sive Preti Joan terris est, vel in Tibet.

Septima Urbs

K I N G Y A N G.

Commendatur urbs Kingyang à moeniorum robore ac firmitate, profundis circum ambientibus fossis, egregium contra Tartarorum irruptiones munimentum præstat, plura etiam castella muro magno habet vicina, olim hæc regio ad Sinicum non pertinuit imperium, sed ad Tartariam Tanyu: at Xius Cinæ familiæ auctor eam occupavit ejectis Tartaris atque intra muri magni fines conclusit, vocavitque Peti: Tanga familia dixit Kincheu; quod jam habet nomen jam inde à Sunga obtinuit familia: totum territorium aquis variis fluminibusque irriguum est, cui quasi pro vallo ac fossis montes sunt & magna flumina. Tria sunt quoque illustria fana, quorum unum idque augustum ac ingens in ipsa urbe est, in cuius una aula magnis columnis suffulta septem supra triginta regum Chevæ familiæ depictæ visuntur imagines. Nascitur hic oryzæ species, quæ purgandis corporibus aptissima est, præcipueque urinam ciet, ac vesicam exonerat; est & herba quædam ad instar flavi capillitii, Sinæ Kinsu, hoc est auream byssum, seu bombycum aurea fila, vocant, amara gustu est, & tamen frigida potius quam calida qualitate ac vi prædita est: hæc omnem longe à corpore pellit scabiem, datur & genus fabæ quod præsentissimum contra omnia venena præstat reme-

*Montes
nobilio-
res.*

Flumina.

*Res ibi
rariores.*